



SULEQATIGIISITSISUT
SAMARBEJDSPARTIET
UPA2019/28
Tillie Martinussen

29. marts 2019 – Siullermeerneqarnera

Issittup Imartaata qeqqani malittarisassaqaanngitsumik aalisarnerup pinngitsoortinnissaa pillugu isumaqatigiisummik Kunngeqarfiup Danmarkip atuutsitsilernissaata Namminersorlutik Oqartussanit akuerineqarnissaa pillugu Inatsisartut aalajangiiffigisassaattut siunnersuut.

(Aalisarnermut, Piniarnermut Nunalerinermullu Naalakkersuisoq)

Isumaqatigiissut manna oqaluttuarisaanermut pingaaruteqarpoq, nersualaartariaqarlunilu. Peqassutsit naassaangitsumik ajoqusernagit piujuaannartitsinissarli anersaaralugu aalisartoqarnissaata anguneqarnissaa pillugu tunngaviusumik mianersortoqarnissaa atorneqaannarani - aamma isumaqatigiissutaassaaq kusanariaqqiffissaqaanngitsoq pissutigalugu nunat amerlalluinnartut isumaqatigiisummumut peqataanerat. Nuanneqateqaanngilaq.

Suliap torrallataanera pillugu Naalakkersuisuusimasoq Erik Jensen allallu nersualaarusuppakka. Kissaatigisinnaagaluarparput tunngaviit taakku aalisarnerup iluani allani aamma atorneqassasut, taakkuli sussa uani eqqaaqqinngiinnassuakka.

Isumaqatigiisummi oqaasertaliunneqartuni takuneqarsinnaasutut akisussaaneq soqutigisallu tasiortut. Naalakkersuisunullu apeqqutissaqarpugut ajortutut paasineqartussaangitsunik, aperiniarpugulli piareersimanissarput soqutiginninnerpullu pissutigalugit.

Apeqqutigerusupparput uangut sinnerluta kikkut nakkutilliissappat?
Danmarkimit umiarsuit alapernaarsuutit aggissappat imaluunniit qanoq tamanna pissamaarpa?

Sunik immikkut aningaasartuutaajumaartussanik kinguneqassava? - Tulliani aningaasanut inatsisissamut siunnersuummi suuneri ersissappat? Suut pilersaarutaapput? Assut pissanganarpoq.

Aamma ataatsimoorluni ilisimatusarnek qilersorfissarput qanoq suliarineqassava?

Aamma sumi ilisimatusarnek inissisimassava suliarineqarlunilu kiisalu aamma nunap inoqqaavisa aamma najukkami najugaqartut ilisimasaanut tunngasortaa? Kattuffiit, peqatigiiffiit il.il. sorliit akuutinneqarniarpat?

Taamatut naatsumik oqaaseqarluta nuannaarluta isumaqatigiissuttip akuerineqarnissaa ilalerparput, taamatullu isikkoqartillugu akuersilluta taaseqataaffigissallugu.

Qujanaq oqaaseqarsinnaagama.